

Headline	PM umum nama universiti Status Apex	Language	MALAY
Date	24. Aug 2008	Page No	24
Media Title	Berita Minggu	Article Size	255 cm2
Section	Nasional	Frequency	Daily
Circulation	342946	Color	Full Color
Readership	2476000	AdValue	4522.29



PM umum nama universiti status Apex

Empat institusi disenarai pendek

LANGKAWI: Perdana Menteri Datuk Seri Abdullah Ahmad Badawi akan mengumumkan nama universiti yang memperoleh status Universiti Apex, pada bila-bila masa, kata Menteri Pengajian Tinggi, Datuk Seri Mohamed Khaled Nordin.

Beliau berkata, Kementerian Pengajian Tinggi sudah menyenarai pendek empat universiti penyelidikan negara bagi mendapat pengiktirafan itu seperti dicadangkan dalam Pelan Strategik Pengajian Tinggi Negara (PSPTN).

"Universiti Apex akan menjadi penanda aras peringkat dunia dalam bidang pengajian tinggi dan langkah memperkenalkan status itu di negara ini dibuat Perdana Menteri sendiri ketika melancarkan PSPTN Ogos tahun lalu.

"Dalam pelan itu, ia membahagikan universiti kepada tiga kumpulan iaitu Universiti Apex, Universiti Elit dan Universiti Kompetitif," katanya selepas merasmikan Seminar Pengurusan Akademik Institusi Pengajian Tinggi di sini, semalam.

Hadir sama, Ketua Pengarah Jabatan Pengajian Tinggi, Prof Datuk Dr Radin Umar Radin Sohadi dan Naib-Canselor Universiti Sains Malaysia (USM), Tan Sri Prof Dzulkipli Abdul Razak.

Mohamed Khaled berkata, keputusan ranking universiti itu kini dimantikan seluruh rakyat Malaysia dan tumpuan menjuru-

rus kepada Universiti Putra Malaysia (UPM), Universiti Malaysia (UM), Universiti Kebangsaan Malaysia (UKM) dan USM.

"Sembilan universiti termasuk tujuh institusi pengajian tinggi awam (IPTA) dan dua swasta, memohon untuk dipilih serta diiktiraf sebagai Universiti Apex tetapi kita hanya memilih empat untuk disenarai pendek," katanya.

Terdahulu dalam ucapannya, Mohamed Khaled berkata, institusi pengajian tinggi di negara ini digalakkan bersaing sesama sendiri untuk menampilkan yang terbaik selain memastikan graduan dilahirkan benar-benar berkelayakan.

"Justeru, selain universiti awam, institusi pengajian tinggi swasta (IPTS) juga semakin berkembang pesat di negara ini dengan menawarkan pelbagai kursus bagi memenuhi keperluan pendidikan dan kerjaya," katanya.

Pada majlis sama, Mohamed Khaled turut melancarkan buku 'Transformasi Pengurusan Latihan Sektor Awam Pendekatan Universiti Sains Malaysia' karya Musa Ali yang juga pensyarah di Unit Latihan USM.



RASM: Mohamed Khaled melancarkan buku 'Transformasi Pengurusan Latihan Sektor Awam Pendekatan Universiti Sains Malaysia' sambil diperhatikan Dzulkipli (tengah) selepas merasmikan Seminar Pengurusan Akademik Institusi Pengajian Tinggi di Langkawi, semalam.